

Pigisanik aalaakkaasunik piginnaatitaaffimmik pisisarnek imaluunniit atuisinnaatitaaneq pillugu**Inatsisartut inatsisissaattut siunnersuut**

(Ineqarnermut, Attaveqaasersuutitut isorliunerusunullu Naalakkersuisoq)

(Siullermeerneqarnera)

Naalakkersuisut qujanaq siunnersuummut.

Piffissami, nunatsinnut soqutiginninnerup annertusigaluttuinnarfiani, inissisimavugut, pingaartuuvorlu ersarissuliornissap nakkutilliinissallu qulakkeersimanissaa, innuttaasut namminneq periarfissaat ajorneruleqqunagit, aammalu tassunga ilutigalugu nunanut allanut politikkikkut pissutsit pisariaqartillugu innimiginissaat. Demokraatinut tamanna tunngavigalugu pingaarnerpaavoq, pigisanik aalaakkaasunik piginnaatitaaffimmik pisisarnerup nakkutiginissaa.

Aallaavittut siunnersuummi siunertat ilalernartippagut, kisiannili tassunga ilutigalugu tusarniaanermi akissutit tiguneqarsimasut tusarnaaqqaarumallugit, ajornartorsiutinik annertuunik tikkuaasut.

GrønlandsBANKEN-ip aamma Bankivik isumakuluutigaat, malittarisassat aningaasaliinissanut aammalu uninngasuutitut periarfissat eqqorneqarsinnaaneri. Aningaaseriviittaaq innersuussutigaaq ilaatigut, immikkut akuersinissamik periarfissat ersarissarneqassasoq, ersarissumillu immikkoortinneqassasut inuinnartut illunik æpisinerit aammalu inuussutissarsiortutut aningaasaliinerit. Isummat taakku silatusaartutut isigaagut ataatsimiititalianilu sukumiisumik suliarineqartariaqarlutik.

Taamatuttaaq Avannaata Kommunanit tusarniaanermut akissut erseqqissarusupparput, apeqqummik pilersitsisoq, danskisut innuttaassuseqarnissamik piumasaqaat pissusissamisuunngitsumik assigiinngisitsinermik kinguneqariataarsinnaanersoq inunnut, Kalaallit Nunaannut aalajangersimasumik attuumassuteqartunut, danskisulli innuttaassuseqanngitsunut. Kommunip tikkuarpaa, tunngaviusut annertunerusumik sumi najugaqarnermik akileraartussaataitanermillu aallaaveqartariaqartut. Pingaarutilik, ataatsimiititaliami sukumiisumik eqqartugassatut kajumissaarutigisarput.

Naggataatigullu aamma isumakuluutigineqartunut isumaqataavugut, ilisimatusarnermut tunngassuteqartunut saqqummiussanut. Imaassanngilaq, nunanit tamalaanit ilisimatusarnerit naallerarneqassasut pisariaqartunik atortorissarusiinissamut imaluunniit suliniutinik piviusunngortitsinissamut, inuiaqatigiinnut tamanut iluaqutaasussanik. Taamaattumik isuma taparserparput, inatsit tulluussartariaqartoq, ilisimatusarneq siunertaanngitsumik eqqugaqqunagu.



Taamatut oqaaseqaateqarluta siunnersuut aappassaaniinginnerani Sanaartornermut Ataatsimiititaliami sukumiisumik suliarineqartussatut innersuussutigaarput.